

Assartuutit motorinik ingerlatillit atornerqarneri pillugit Namminersorlutik Oqartussat nalunaarutaat

Avatangiisit innarlitsaaliorneqarnissaannik Inatsisartut inatsisaani nr. 9-mi, 22. november 2011-meersumi, Inatsisartut inatsisaatigut nr. 1-ikkut, 29. maj 2012-imeersukkut allanngortinneqartumi § 10, imm. 1, nr. 27, § 66, imm. 3, § 67 aamma § 68 naapertorlugit aalajangersarneqarpoq:

Atuuffissai il.il.

§ 1. Pinngortitap avatangiisillu illersorneqarnissaat eqqarsaatigalugu assartuutit motorillit sumi atornerqarsinnaaneri pillugit malittarisassat nalunaarummi uani aalajangersarneqarput.

Imm. 2. Illoqarfiit nunaqarfillu nalunaarummi matumani tassaatinneqarput nunaminertat, kommuninut pilersaarummi illoqartittut nunaqarfittullu siunertaqarfusunut atugassanngortinneqartut.

Imm. 3. Nunaannaat nalunaarummi matumani tassaatinneqarput nunaminertat, illoqarfiit nunaqarfillu avataaniittut.

Imm. 4. Kangerluit imartallu sikuunermik nalaani nunaannarmiittut naatsorsuunneqassapput.

Imm. 5. Nalunaarut manna Kalaallit Nunaata avannaarsuani Tunumilu nunamut eqqissisimatitamut, kiisalu sermersuarmut serminullu sermersuarmiit iigarfusartunut atuutinngilaq.

§ 2. Assartuutit nalunaarummi uani tassaatinneqarput qamutit motorillit suulluunniit larvefodillit assakaasunilluunniit ingerlatillit, sikumi, apummi, qaqqani kiisalu nunap ilusaani allani allanngortinneqanngitsuni atugassatut sanaat taakkunaniluunniit atornerqartartut.

§ 3. Aqqusinerni, unittarfinni narsaatinilu il.il., pilersaarusiortarnermut inatsit malillugu atuisinnaatitaanissamik pisariaqartitsiviusuni angallanneq, kiisalu inuussutissarsiutigalugu nersutaateqarnermik ingerlatsinermut atatillugu angallanneq nalunaarummut matumunnga ilaatinneqanngillat.

Imm. 2. Nakkutilliinermut oqartussaasut avatangiisinik pinngortitamillu nakkutilliinerannut, annaassiniarnernut, politiit paasiniaanerinut, sakkutuut suliaqarnerinut assingusunullu atatillugu angallannerit nalunaarummut matumunnga ilaatinneqanngillat.

Imm. 3. Sumiiffinni, angallatit motorinik ingerlatillit atorlugit angallannermut inatsisit allat aqqutigalugit maleruagassiuiffiusuni, maleruagassiat sukkulluunniit killilersuiffiunerusut atuutissapput.

Assartuutininik motorinik ingerlatilinnik atuineq

§ 4. Illoqarfiup nunaqarfullu killeqarfiata iluani assartuinnermut aqutini angallannermullu killeqarfiit iluini assartuutiniq motorinik ingerlatilinnik atuisarneq inatsisit allat eqqarsaatigalugit kommunalbestyrelsimit maleruagassiuunneqassaaq.

Imm. 2. Imm. 1 naapertorlugu assartuinnermut aqutini angallannermullu killeqarfiit iluini assartuutiniq motorinik ingerlatilinnik atuineq kommunip maleruagassiaani aalajangersarneqassaaq.

§ 5. Nunaannarmi assartuutiniq motorinik ingerlatilinnik atuissaq inerteqqutaavoq, taamaattorli tak. §§ 3 aamma 6.

Imm. 2. Sumiiffinnik immikkut sunnertiasunik, assartuutiniq motorinik ingerlatilinnik tamanik atuissamut inerteqquteqarfusunik maleruagassiuiffusunilluunniit Naalakkersuisut toqqaasinnaapput.

Imm. 3. Angallannermut killeqarfiit iluini aamma/imaluunniit assartuinnermut aqutini, § 6, imm. 1 aamma 2 naapertorlugu atugassanngortinneqarsimasuni Naalakkersuisut angalanissamut inerteqquteqarsinnaapput.

§ 6. Kommunalborgstyreliq Kalaallit Nunaanni Pinngortitaleriffiup siunnersuinnera tunngavigalugu nunaannarmi ukiuinnerani assartuinnermut aqutissat aamma/imaluunniit ukiuinnerani angallavissat toqqartorsinnaavai, § 7-imi aamma 8-mi piumasaqaatit ataanni assartuutit motorinik ingerlatillit sukumiisumik nassuiarneqartut angallatigineqarpata.

Imm. 2. Kommunalborgstyreliq Kalaallit Nunaanni Pinngortitaleriffiup siunnersuinnera tunngavigalugu nunaannarmi aasaanerani assartuinnermut aqutissat aamma/imaluunniit aasaanerani angallavissat toqqartorsinnaavai, § 7-imi piumasaqaatit naammassineqarsimanngikkaluarpataluunniit angallatit motorinik ingerlatillit atorlugit angalanissaq inerteqqutaanngippat.

Imm. 3. Kommunalborgstyreli § 7-imi pinngortitamik illersuissamut piumasaqaatinut minnerpaaffiliussat saniatigut aqutini angallavinnilu, imm. 1 aamma 2 naapertorlugit atorneqarsinnaasuni aputip issussusissaanut piffissamullu piumasaqaatinik ersarinnerusunik aalajangersinnaapput

Imm. 4. Aqutit angallaviillu, imm. 1 aamma 2 naapertorlugit atugassanngortinneqarsimasut atorneqarneri inuussutissarsiutinut ersarinnerusumik aalajangersarneqartunut inuussutissarsiutigalugu angallavissatut killilerneqarsinnaapput.

Imm. 5. Assartuutiniq motorinik ingerlatilinnik assartuinnermut aqutini angallannermullu killeqarfiit iluini § 6, imm. 1-3 naapertorlugu aalajangersarneqartuni atuinnermut kommunip aalajangersagai kommunip malittarisassaani aalajangersarneqassapput.

Angallannermut ataatsimut aalajangersakkat

§ 7. § 6, imm. 1-imi ukiuinnerani assartuinnermut aqutissatut ukiuinneranilu angallavissatut toqqarneqartuni nunap qerinnerani, apummik qallerneqarnerani aammalu naasunut nunamullu ajoqusiiviusinaanngitsumik angallavissaalernerani angalanissaq inerteqqutaanngilaq.

Imm. 2. § 6, imm. 2-mi aasaanerani assartuinnermut aqutissatut aasaaneranilu angallavissatut toqqarneqartuni kommunip maleruagassatut aalajangersagai malillugit angalanissaq inerteqqutaanngilaq.

Imm. 3. Imm. 1-imi aalajangersakkat immap sikuani aammalu tatsit kuuillu sikuini angalanermut atuutinngillat.

§ 8. Angalanermi nuna naasunut aseruutaasinnaasumik sangupiloorfigineqassanngilaq, aallarsarfigineqassanngilaq unipiloorfigineqassananiluunniit.

Imm. 2. Kuuit sinaat uingarnillu kiisalu tatsit killingi, kuuit annerit kiisalu kangerluit ikaarneqartassapput, naasut nunallu ajoquserneqarfissarinngisaasigut.

Immikkut ittumik akuersissuteqartarnerit

§ 9. Pisuni immikkut ittuni kommunimi assartuinnermut aqutissatut angallannernullu killeqarfii iluini atugassiissutigineqartut avataani assartuutit motoorinik ingerlatillit atorlugit angalanissamut kommunalbestyrelsi immikkut ittumik akuersissuteqarsinnaavoq.

Imm. 2. Immikkut ittumik akuersissuteqartoqarnissaanut qinnuteqaat tunngavilersugaq angalanissaq pilersaarutaasoq kingusinnerpaamik sapaatit akunnerinik sisamanik sioqqullugu kommunalbestyrelsimit tiguneqarsimassaaq, aammalu nunaminertat imaluunniit aqutissat nalunaarsorneqarnerinik imaqassalluni.

Imm. 3. Kommunalborgstyrelsi immikkut ittumik akuersissuteqarnermut atatillugu naapertuuttutut isigineqarsinnaasunik piumasaqaateqarsinnaavoq.

Imm. 4. Immikkut ittumik akuersissutit Avatangiisinut Naalakkersuisoqarfimmut ilisimatitsissutitut nassiunneqassapput.

Imm. 5. Imm. 1 aamma imm. 2 naapertorlugu akuersissutit sukkulluunniit kommunalborgstyrelsimit imaluunniit Naalakkersuisunit allanngortinneqarsinnaapput utertinneqarsinnaallutilluunniit, immikkut ittumik akuersissuteqarnissamut piumasaqaatit unioqqutinneqarpata, imaluunniit kommunalborgstyrelsi Naalakkersuisulluunniit naliliinerat malillugu pissutsit pingortitamut avatangiisinullu ajoqusiinnaasut pineqarpata.

Imm. 6. Immikkut ittumik akuersissutit ukioq ataaseq tikillugu tunniunneqartarsinnaapput.

Imm. 7. Pisuni immikkut ittuni, soorlu piniariarnernut, timersornermik aaqquissuussinernut, pisortat assartuussinerinut, ilisimatusarnikkut suliniutinut il.il. atatillugu, § 6, imm. 3 naapertorlugu aalajangersakkanik aalajangersarneqartunik saneqqutsinissamut kommunalborgstyrelsi akuersissuteqarsinnaavoq.

Nakkutilliineq il.il.

§ 10. Kommunalborgstyrelsi nalunaarummi uani malittarisassat malinneqarnersut nakkutigissavaa.

Imm. 2. § 7, imm. 1-imi aamma 2-imi angalanermut maleruaqqusat piffissap ilaani naammasineqarsimanngippata kommunalborgstyrelsi inerteqquteqarsinnaavoq peqqussuteqarsinnaallunilu.

Imm. 3. Peqqussutit tassaasinnaapput angallaviit aalajangersimasut atorneqarnissaannik piumasaqaatit.

Imm. 4. Inerteqqutit tassaasinnaapput sumiiffinni aalajangersimasuni piffissami aalajangersimasumi angallannerup tamarmi unitsinneqarnissaanik piumasaqaatit.

§ 11. Nalunaarut manna naapertorlugu aalajangikkat tamarmik avatangiisit innarlitsaaliorneqarnissaat pillugu Inatsisartut peqqussutaanni nr. 9-mi, 22. november 2011-meersumi kapitali 14-imi malittarisassat naapertorlugit naammagittaalliutigineqarsinnaapput.

Pineqaatissiinerit atuutilernissaanullu aalajangersakkat.

§ 12. § 5-imik, § 6 imm. 1-4-mik, § 7 imm. 1-imik aamma 2-mik aamma § 8-mik unioqqutitsineq akiliisitsinermik aamma/imaluunniit arsaarinninnermik kinguneqarsinnaapput.

Imm. 2. Piumasaqaatinik, § 9, imm. 3 naapertorlugu aalajangersarneqartunik unioqqutitsineq akiliisitsinermik kinguneqarsinnaavoq.

Imm. 3. § 10, imm. 2-4 naapertorlugit peqqussummik imaluunniit inerteqqummik unioqqutitsineq akiliisitsinermik kinguneqarsinnaavoq.

Imm. 4. Nalunaarummi akiliisussanngortitsineq tunngavilerneqarsimatillugu, Kalaallit Nunaanni Pinerluttulerinermut inatsimmi maleruagassat malillugit suliffeqarfik akiliisussanngortinneqarsinnaavoq.

Imm. 5. Imm. 1-4 naapertorlugu akiliisitsissutit Nunap Karsianut nakkartinneqartassapput.

§ 13. Nalunaarut manna 1. januar 2014-imi atuutilerpoq.

Imm. 2. Tamatuma peqatigisaanik Sisimiut, Kangerlussuup Maniitsullu eqqaanni assartuutit motorinik ingerlatillit atornerarneri pillugit Namminersornerullutik Oqartussat nalunaarutaat nr. 5, 25. maj 1999-imeersoq, kiisalu Uummannami Upernavimmilu assartuutit motorinik ingerlatillit atornerarneri pillugit Namminersornerullutik Oqartussat nalunaarutaat atorunnaarsinneqarput.

Namminersorlutik Oqartussat, ulloq 10. oktober 2013

Mette Lyngé

/

Søren Stach Nielsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

